



Issue 1


Yanüari - aprel
2009

KoranTriangel

Topikonan:

- Hóbennan di Jong Bonaire a habri aña 2009
- Churandy Martina di bishita serka hóbennan di Jong Bonaire
- Workshop pa e trahadonan: "Mishon 2009"
- Regalo di kumpleaño pa Jong Bonaire
- Eksitoso Jong Bonaire Funwalk & Bike
- Luna kultural na Sentro pa Hubentut Jong Bonaire
- Kurso Edukashon Seksual
- Boutismo unifòrm tim futsal Jong Bonaire
- Klasifikashon Pinpòn aña eskolar 2008 / 2009
- Hopi Kampion Hoben di siman
- Kalendario

**I
n
f
o
r
m
a
t
i
v
o**



Jong Bonaire



Jong Bonaire





Den aña 2009 Jong Bonaire ta pará dilanti di selebrashon di 10 aña di apertura ofisial pa aktividatnan despues di skol. 10 aña di Jong Bonaire den un forma "nobo" i 50 aña di eksistensia di "stichting prinses Beatrix Jeugdwerk".

Lo bira un aña di selebrashon, un aña di reflekshon, un aña pa hasi adaptashon kaminda ta nesario i fortifiká loke ya ta na su lugá, un aña pa redefiní e rumbo ku nos kier bai **HUNTU KU NOS HÓBENNAN.**

Esakinan ta palabranan ku kua sra. Jona Chirino- Felida, manager di Jong Bonaire a kuminsá e di tres periodo pa aña eskolar 2008 - 2009.

Ku hopi plaser nos ta ofresé na mayornan un edishon mas di nos korant informativo di Jong Bonaire ku yama Triangel. E triángulo ku mester representá e relashon entre mayor di e hóben ku ta miembro, skol kaminda e miembro ta bai i Jong Bonaire. Nos ta pone hopi balor na e kontakto entre e tres grupo di aktornan aki komo ku ta huntu so nos por logra traha efisientemente na e desaroyo di e hóben. Pa tal rason tambe nos ta keda enkurashá mayornan pa ta enbolbí na lokenan ku ta pasa ku e yu(nan) na skol i tambe na Jong Bonaire. Den e aña eskolar aki nos ta hopi kontentu ku partisipashon di mas ku 75 % di mayornan na minimal 1 workshop ku Jong Bonaire a organisá. Nos lo kier sigui ku e kontakto aki ku mayornan i mira e otronan ku no a presentá nunca tambe na nos aktividatnan pa mayor òf pa famia. Nos próksimo aktividat lo ta **djabièrnè 15 di mei 2009, kaminda nos ta bai tene un dia di famia pa tur miembro i nan famia** aki na Jong Bonaire mes, for di tres or di atardi te ku och'or di anochi. Nos ta warda TUR e famianan.

Tambe nos kier informá mayornan ku nos websait ta renobá i regularmente nos ta pone fotonan i informashon nobo riba dje. Tira un bista na www.jongbonaire.org. Nos ta apresia tur momentu ku mayornan tuma kontakto ku nos pa interkambiá di desaroyonan ku nan yu. Pues, nos ta keda den kontakto ku otro i tur remarke òf sugerensha ta bon biní.

Jona Chirino- Felida.

Hóbennan di Jong Bonaire a habri añá 2009

Ya ta dos añá kaba hóbennan di Jong Bonaire a organisá fiesta di mucha ku "Beanie Babies" o sea peluchonan chikitu. Añá pasa Jong Bonaire a haña mas ku 100 Beanie Babies di donashon serka e Sra. merikano, The Beanie Baby lady Sra. Bonnie Pascoe ku ya tin un par di añá ta biba aki na Boneiru. E añá aki atrobe Bonnie a trese un kantidat grandi di Beanie Babies pa hóbennan di Jong Bonaire regalá muchanan chikitu di Boneiru. Pa habri añá 2009 e hóbennan di Jong Bonaire a invitá diferente mucha bou di 10 añá pa partisipá na e selebrashon aki. Ytala Seket, un eks miembro di Jong Bonaire i awor ta un lider boluntario hóben di Jong Bonaire, mes a guia i sòru pa tur detaye di e organisashon di e atardi agradabel i eksitoso aki. Den e parti pa entretené e muchanan tabatin aktividatnan manera pintamentu, plakmentu, obra di man, wega di bowling, balia hula hoep, bula kabuya i mas. Tambe e muchanan por a saka pòtrèt ku nan beanie baby pa rekuerdo. Kada mucha ku a partisipá a gosa un bòl i por a bai kas ku nan bunita "Beanie Baby".



Churandy Martina di bishita serka hóbennan di Jong Bonaire

7 di yanüari Churandy Martina tabata di bishita na Boneiru. Na e okashon aki hóbennan di Jong Bonaire tabatin e honor di risibí bishita di e atleta máksimo Churandy Martina kende pa e hóbennan di Jong Bonaire ta e di dos hóben koredó na mundu ku ta kore mas duru.

Tabata un dia kaminda hopi mucha di skolnan básiko i hóbennan no miembro di e sentro a probechá di e momentu aki pa sera konosí ku e persona aki djaserka.

Na Jong Bonaire Churandy Martina a pasa DVD di klínikanan di e deporte di atletismo i despues den su propio palabranan a enkurashá nos hóbennan pa perseverá den tur ramo di deporte ku nan ta práktika.

For di man di nos hóbenan ku ke bira atleta, Ricki Alberto i Jamal Trenidad, Churandy Martina i sr. Ruthsel Martina presidente di NAAU., a risibí e kalènder di Jong Bonaire di aña 2009 " Dreams of the kids of Jong Bonaire" komo regalo.

Despues tantu mucha, hóben i adulto a haña e oportunitat pa saka potrèt i/of haña un firma di Churandy.

Despues Churandy a invitá tur hóben i muchanan pa bai stadion pa un klínika.

Na e okashon aki Churandy a pidi yudansa di nos hóbenan di Jong Bonaire pa duna un man pa guia tur e muchanan ku ta tei presente.



Workshop Mishon 2009

Staf di Jong Bonaire tabatin un siman di workshop. E workshop aki ta pa definí e 'Mishon pa Jong Bonaire den aña 2009'. E promé dianan e workshop tabata bou di guia di Jona Chirino-Felida. Tabata dianan hopi intensivo mirando ku e vishon di e manager aktual i tambe di e direktiva di Jong Bonaire ta pa engrandesé i hasi e sentro di aktividat mas atraktivo i edukativo p'e hóben. E último dia di workshop tabata bou di guia di sra. Carla Martina di e kompania Experientia. Miembronan di staf a partisipá ku hopi ánimo i por mira bek riba dianan éksitoso.



Regalo di kumpleaño pa Jong Bonaire

Arjan Schipper i Andrea Raken kende ta biba temporal na Boneiru, a selebrá nan kumpleaño na Hulanda den kompania di nan amistades nan. Nan petishon na e invitado nan tabata pa hasi un donashon na Jong Bonaire enbes di regalá nan un regalo personal.

E suma ku a keda rekoudá, na nan turno a dòbel esaki i hasi entrega di e check djaweps último na e gerente di Jong Bonaire Sra. Jona Chirino den kompania di algun miembro di e sentro.

E fondo sigur lo yuda pa kontinuá ku e programa pa hóben nan despues di skol, kual awor aki tin 10 aña di eksistensha.

Direktiva, personal i tur miembro di Jong Bonaire kier gradisí Arjan i Andrea pa e generoso regalo.



Eksitoso Jong Bonaire Funwalk & Bike

Sentro Pa Hubentut Jong Bonaire a organisá nan di dos kaminata kombiná ku kore baiskel, kual tabata un éksito kompletu . E evento aki no tabata un kompetensha, pero tabata un bon oportunidad pa e personanan ku ta kana i kore baiskel train nan kondishon i pasa un mainta agradabel den kompania di e otro partisipante nan.

Por a nota e aña aki ku tabata tin dos kompania ku nan personal tabata hopi bon motivá, kual ta Cargill Salt i Warehouse. Jong Bonaire ta spera ku otro aña nos por konta ku presensha di mas kompania pa partisipá na e tremendo Funwalk & Bike.



E aña aki e evento aki a konta ku partisipashon di 86 adulto i 11 mucha, di kual 36 persona a kore baiskel i 61 persona a kana na pia.

E persona di mas edat ku a partisipá tabata tin 70 aña i esun di mas jong tabata tin 8 aña.

E personanan ku a yega promé den kategoria di adulto: Nazario Alberto ku a kana den 2 ora i 38 minüt , Bradley Swanson ku a kore baiskel den 1 ora i 40 minüt.

Kategoria di mucha : Amber Lensink a kana den 3 ora i 15 minüt, Percy Prudencia a kore baiskel den 2 ora i 40 minüt.

Pa por haña un bista di e evenemento por bai riba e website di Jong Bonaire: www.jongbonaire.org



Luna kultural na Sentro pa Hubentut Jong Bonaire

Aña 2009 a wòrdu skohe komo e aña kultural, pa e motibu aki tambe Sentro pa Hubentut Jong Bonaire a skohe e luna di mart komo luna kultural. Durante henter e luna di mart e hóben nan di Jong Bonaire a partisipá den un seri di 13 charla ku un variashon ku ta kuminsá for di kon pa traha un kura di yatu te na kon pa traha instrumènt. Un kantidat di hende grandi nan di nos isla ku ta nos mes eksperto nan kultural a guia e charla nan ku a tuma lugá na diferente lokalidat manera e.o. Jong Bonaire i Mangasina di Rei.

E luna kultural a wòrdu plania pa e hóben nan por siña aserka di e diferente aktividatnan kultural i e herensia nan di e isla pa asina por sigui pasa e siñansa over na otro nan den futuro. Despues di a kompletá e charlanan, kada hóben mester prepará un proyekto pa e eksposishon kultural ku lo wòrdu tene den e último siman di mart na e Sentro pa Hubentut Jong Bonaire.

E programa kultural i e kalènder di Jong Bonaire pa aña 2010 ta hiba komo tema " Tesoronan di Boneiru". E tesoronan ta repartí den tres parti: Boneiru su herensha kultural, e hende grandi nan ku ta yuda perseverá e kultura i tambe mas ku klaro e hóbenan ku lo sigui kontinuá ku e tradishon.

E ganadornan di e proyekto kultural lo presentá huntu ku e ekspertonan den e kalènder 2010 di Jong Bonaire. Lo bai traha foyeto di e proyekto kultural ku di es manera ei por sigui pasa e siñansa over den skolnan i tambe na otro organisashonnan asina ku e programa kultural Jong Bonaire lo benefisiá e hóbennan i tambe e komunidad pa aña nan benidero.

E diferente tópikonan ku a wòrdu duna ta :

- * Pan sera (Sr.Jan Felida i Sra. Jenny Christiaan).
- * Kura di yatu (Sr.Rodger Gijsbertha).
- * Boka dushi (Sra.Jenny Landskin i Sra.Eva Koko).
- * Kas di bara (Sr.Elvis Vlijt).
- * Simadan (Sra.Minhela Helmyr i Sra.Fina Chichi).
- * Supla karkó (Sr.Hubert Mercera).
- * Yerbanan (Sra.Dinah Veeris).
- * Traha yòrki (Sr.Toto Finies).
- * Traha boto (Sr.Ishmael Soliano).
- * Fòrnu Kalki (Sr.Felipi St.Jago).
- * Traha karbon (Sr.Elmer Frans).
- * Traha instrumènt (Sr.Jan Felida).

Traha kura di yatu

E hóbennan di Jong Bonaire a siña kòrta e yatu i ku uso di e chi ku cha pa karga e yatu i pone na su lugá adekuá.



Pan sera

Sr.Jan Felida i Sra.Jenny Christiaan a siña e hóbennan di Jong Bonaire kon pa traha pan sera i hinka nan na fòrnu di karbon. Dos hóben a yuda traha e mansa di e pan.

Traha kokada pretu

Sra.Eva Koko a siña e hóbennan traha boka dushi di koko, kual ta kokada pretu.

Traha yòrki

Sr. Toto Finies a duna un demostrashon na e hóbennan kon tabata mata kabritu ántes, i kiko mester hasi pa por traha yòrki.

Supla karko

Sr. Hubert Mercera a duna un demostrashon kon pa supla karko i tambe kiko mester hasi ku e karko pa por haña e zonido.



Traha instrumènt

Sr. Jan Felida a mustra e hóben nan kon por traha un flùit ku palu di maishi.

Algun hóben tambe yuda traha flùit.

Despues di dos siman intenso di charla e hóbennan a haña un siman di tempu pa por traha riba nan presentashon di lokual ku nan a siña i presentá esaki den e eksposishon. E e ganadornan di e proyekto aki ta:

- * Pan Sera - Mary-Nouska Candelaria
- * Kura di yatu - Julio Mercedes
- * Kokada - Natasha Bernabela
- * Kas di bara - Marielle Domacasse
- * Simadan - Diomira Janga
- * Supla Karko - Charlton Christiaan
- * Yerbanan - Enice Leito
- * Traha yòrki - Bregje Koedooden
- * Traha boto - Yaël Soliano
- * Aloë - Rhyanne Janga
- * Traha Karbon - Charlton Theodora

Kurso Edukashon Seksual

Pa aña kaba Sentro pa Hubentut Jong Bonaire ta un di e organisashonnan ku ta duna e kurso di edukashon seksual na hóbenan entre 12-14 aña i tambe 15-18 aña.

Na fin di mart pa ta eksaktamente 27 mart, e promé dos gruponan di kada kategoria a finalisá e kurso di edukashon seksual ku éksito. Despues di 6 enkuentro e hóbenan a risibí nan sertifikado. Durante di e kurso a trata diferente tópikonan, manera

entre otro e kambio di e kurpa, norma i balor, malesanan venérico etc. E hóbenan ku a partisipá na e kurso tabata hopi bon motivá i tabata partisipá ku entusiasmo.

Despues di e kurso a haña hopi bon reakshon tantu di e hóbenan i e mayornan ku ta sumamente kontentu ku e yunan por a haña e oportunidad pa por a sigui e kurso i tambe ta habri e kaminda pa nan ku ta mayor pa por papia mas habri ku e yunan di e tópikonan aki.

Sentro pa Hubentut Jong Bonaire lo sigui tene mas di e kursonan aki den transkurso di aña i e ta habrí pa tur hóben ku ta biba na Boneiru basta ku nan ta kai den e kategoria di edat menshoná. Mayornan ku ta deseá pa nan yu por sigui e kurso di edukashon seksual por tuma kontakto ku e sentro na 717-4303 òf por pasa na Jong Bonaire i inskribí e yu.

Sentro pa Hubentut Jong Bonaire ta yama danki na e mayornan ku tambe a hasi nan posibel pa por a haña mas material pa por hasi uso di dje durante di e kurso.



Boutismo unifòrm tim futsal Jong Bonaire

E aña aki e hóbenan a destaká manera tur aña den kompetenshanan deportivo manera e.o vòlibòl i futsal.

Den mart tabatatin boutismo di e unifòrm di e tim di futsal Jong Bonaire Boys, ku lo representá Boneiru den e kompetensha deporte eskolar interinsular. Sigur pa simannan largu e hóbenan aki a trein duru bou di guia di e dos entrenadornan kual ta Ruviano Josephia i Rudsel St.Jago pa asina por mantené e kalidat di futsal na un nivel haltu.



Klasifikashon Pinpòn aña eskolar 2008 / 2009

Durante henter aña eskolar ta tene e kompetensha di pinpòn entre e miembronan. Na final di aña eskolar nan ta kompetí pa e trofeo. Durante di e luna di febrüari i mart e siguiente hóbenan ta den e tòp 10:

1. Carlos Briceño
2. Milton Frans
3. Dwayne Domacasse
4. Percy Prudencia
5. Angelvis Ramos
6. François Soree
7. Gerson Cratsz
8. Julio Mercedes



Jong Bonaire kier felisidat e hóbenan aki i pa nan sigui ku e mesun motivashon aki pasobra fin di aña eskolar e kompetensha mes lo tuma lugá.

Jong Bonaire ta yama danki na tur e entrenadónan ku ta trahando duru pa hisa e nivel di pinpòn di e hóbenan.

Hopi kampion

E hóbenan ku ta bishitá Jong Bonaire ta haña oportunidat pa desaroyá diferente talento ku nan tin. Nos ta sumamente kontentu ku resultadonan di kompetensha durante di e aña eskolar 2008 - 2009. Hóbenan representando Jong Bonaire a sobresalí !!!!

Kampion di beach Vòlibòl- torneo Nort Saliña Braves

Jamal Trenidat - Ederic Goeloe - Marvelous Maingot.

Kampion torneo di vòlibòl Junior Maskulino

Rayonell Lindeborg - Jamal Trenidat - Marvelous Maingot - Ederic Goeloe - Jeath Koeks - Angelvis Ramos - Benjamine Winklaar - Ray - Germain Winklaar - Edsel Martha.

Kampion Torneo di FUTSAL eskolar Boneiru i

kampion FUTSAL eskolar interinsular.

Giovanni Morillo - Edsel Martha - Jurgen Rojer - Calrick Alberto - Ederick Goeloe - Adri Silberie - Wilson Alvarado - Gerritson Craane - Rayonell Lindeborg - Sigmar Martijn - Ericson Vlijt

Ganadó absoluto den Arte di palabra entre Kòrsou - kategoria kuenta.

Natasha Bernabela

Hóben di Siman 2009

* Daniek Thielman	- 16 yanüari
* Mary-Nouska Candelaria	- 23 yanüari
* Chantal Nahr	- 30 yanüari
* Thevin Clappers & Christopher Dirksz	- 6 febrüari
* Percy Prudencia	- 13 febrüari
* Sharsy Anthony	- 20 febrüari
* Marielle Domacasse & Sharlina Molina	- 6 mart
* Juliano Clarenda	- 13 mart
* François Soree	- 27 mart
* Giovanni Morillo	- 24 aprel

Kalendario

* Family day	- 15 mei
* Triatlòn	- 7 yüni
* Kampamentu	- 1, 2, 3 yüli
* Inskripshon pa aña eskolar 2009-2010	- for di 3 di ougùstùs